




Kibaru

ò kalo o kalo "AMAP" ka yamaruya kònò

KONC

- NYE 2: KA BO MALI BALI-KUKALAN BAARADA DNAFLALA



- NYE 3: SEKO ANI DONKO KENE:

Nsiirinw, kumarkòròmaw ani poyiw n'u nyögònaw minnu kalanni bè mògò ka donniya sankòròta

- NYE 6 ani NYE 7: KIBARU KANUBAGAW KUMA YORO:

Lètèrè minnu cira KIBARU ma BP 24 Bamakò (Mali) ka b'o kalanbagaw n'a lafasabagaw yòrò.

- NYE 8: YERETA DEFILEKENE BAMAKO.

Nyinan, Mali ka yèrèta san 28nan defilekènè jama cayara bawo, biyenalikèlaw farala Bamakòkaw kan. A fotow bè nyè 8 la.



«OLP» PERESIDAN YASERI ARAFATI TUN BE DEFILE KENE KAN BAMAKO

Mali ka yèrèta sanyèlèma 28 nan

Ka Malidenw to zenerali Musa TARAWELE sigili gintanw na, k'a kè Afiriki jama-naw ka kelenyatòn «OUA» Peresidan ye, wale kologirin fila bennna nyögòn ma, Mali jamana kònò: Mali denmisènw ka BIYENALI 10nan ani YERETA sanyèlèma 28nan.

O wale fila benni nyögòn ma, o b'a jira bée la, kènè kan, ko MALIKO ye nyètaako dòròn de ye, kòfilè ani seginko tè nyètaa min na. (a tò bè nyè 4 ani nyè 5 la)

1988 Biyenali 10nan



1988 BIYENALI KUNCERA NI BAMAKOKAW KA NYESORO YE NYOGONDANW BEE LA.

Ka bò Mali balikukalan baarada "DNAFLA" la

BI MA BALIKUKALAN DAMINE
MALI KONO

- Ko o ko ni mògòninfin y'a daminè, a ka kan i k'i kòfilè.

- Bi ma Balikukalan daminè Mali kònò. A bennèn bè tuma bée an k'an hakilijagabò ko kèlenw kan :

- Baara minnu kéra

O hukumu kònò, an bèna an hakilijigin waati kérènkérènnennw na, minnu ka kan ka to mògò kònò.

SAN 1960

Mali ka yèrèmahòrònya ta san. Tubabuw taara, Mali dun ye sènèkè ani baganmara jamana ye. O baarakèlaw tilancè bée ye kalanbaliw de ye. O de sababu la, an ka jamana nyémögòw ye fèerè dòw tigè walasa ka kalanbaliya kèle, bawo «Kalan de bë sòrò yiriwa».

San 1961 - fò san 1967

Ko caman kéra o furancè kònò

«Nègè goniman de gosi ka di». Bila-kasuma ma sòrò a la. Mali nyémögòw ye Baarakèda kura dayèlè min tògò tun ye «EDUCATION DE BASE» k'a nyèsin BALIKUW bée ma, minnu ma kalan. O kalan tun bë kë «TUBABUKAN na». Nka jateminè kéra ko gèlèyaba sòròla o kalancogo la, bawo «Walikan tè yèrèkan bò»

Lajèba dò kéra Teran, Iran Jamana kònò Sètanburukalo tile 3 fo a tile 8 san 1965 dinyè Minisiriw fè minnu ka baaraw nyèsinnen bë kalankow ma u ka jamanaw kònò. Mali Minisiri fana tun bë o lajèba in na. U ka nyògonye kologirin tun bë kalanbaliya kèleli de kan. Lajè in kéra «UNESCO» ka yamaruya de kònò, n'o ye jamana hòrònyalenw ka tòn bolofara ye, min nyèsinnen don kalan ni seko ni dònko ma.

«AN K'AN DEGE KALAN NI SEBENNINA». O miiriya yèlémara ka jiidi ka kë «KALAN BE SORO YIRIWA» ye.

Walasa k'o miiriyaw waleya ani k'u teliya, jamana nyémögòw y'a nyini an ka baarakè n'an «Yèrèkanw» ye, bawo foyi tè yèrèkan bò.

San 1972

«PNUD» ni «UNESCO» ka dèmè jòra an ka jamana kònò, o y'a sòrò BALIKUKALAN jènsènna kosèbè Mali kònò.

O sanyèlèma 1973, ja nana dò fara gèlèyaw kan ka da «PNUD» ka dèmè jòli kan. O kéra sababu ye «KALANSO

CAMAN DATUGURA». BALIKUKALAN yoboyabara kosèbè Mali kònò.

San 1975

Dinyè warimarasoba «BANQUE MONDIALE» ni Kanada dèmèkèjekulu «ACDI» ka dèmè kéra sababu ye ka Balikukalan nyènèmaya; mògòw dusu laminna ko kura.

BALIKUKALAN BAARADA «DNAFLA» sinsibere kéra ko 2 (fila) de ye :

a) Cikèla kalanbaliw bée kalanni.

b) An ka kanw kalanni lakòlisow kònò.

Jamana nyémögòw ye sèbèn bò ka balikukalan bolofara sigi «Opération de développement rural» bée kònò n'o ye cikè baaradaw ye. O de kòsòn Balikukalan Baarada ye mògò kelen bila ka taa o ciyakèda kelen-kelen bée la : «OACV 1976»; «ODEM 1976»; «ODIK 1978»; «OMM 1979»; «CMDT 1977»; «OHV 1980»; «ORM 1980»; «COOPERATION 1980»; n'o ye kopératifuw ka sèriwisiba ye.

San 1978 Maristikalo la

a) Balikukalan miiriya jònjin kéra «LADAMUNI JUMEN NI YIRIWALI JUMEN KAMA ?»

- Kalansen kura donna balikukalan na «KALANDEN JOLENW KALANNI BAARA-KALAN NA», min kun ye : ka cikèlakòlidew senbò dòonin-dòonin dugumisènw baara dòw la, i n'a fò sanniféere latèmèni kalanden jolenw ma. KALANDEN JOLENW bë se fana ka baara misèn wèrèw kë : nisòngò minèli, kopératifu sigili, faramsi kow nyènabòli.

b) An ka kanw kalanni lakòlisow kònò.

Lakòliso fòlò minnu jòra san 1978 olu kéra :

- Kosa, Njifinna (Kulukòrò mara la)

- Banankòròni, Zanabugu (Segu mara la)
Bi bi in na, an ka kan 4 (naani) de hè kalan an ka Lakòlisow kònò : BAMANAKAN-FULAKAN-BURUDAMEKAN-KORBOKAN.

An bë don min na bi, i n'a fò san 1987-1988, Lakòliso minnu, n'an ka kanw bë kalan u kònò olu ye 83 ye.

- KALANSO ye 378 ye

- «1er cycle» dakunfòlò o ye 375 ye

- «2e cycle» dakunfilan o ye 3 ye (Banankòròni) Segu mara la.

- LAKOLIDENW hakè ye 13000 nyògòn ye.

- LAKOLIKARAMOGOW hakè ye 423 ye.

SAN 1985 JAMAKALAN

Jamakalan ye mun ye ? A nyèsinnen bë jònw ma ?

- Jamakalan ye kulu kalan de ye minnu ma deli ka kalan fiyewu.

- A nyèsinnen bë cikèlaw de ma an ka dugumisènw bée kònò.

An y'a fò sanfè ko Mali ye baganmara jamana ani sènèkè jamana ye, olu baarakèlaw caman dun ye mògò kalanbaliw ye. O la, JAMAKALAN ye fèn ye, min bë kë sababu ye ka kalanbaliya kèle an ka jamana kònò.

O de kama, an ko «KALAN BE SORO YIRIWA». Jamakalan in waleyara an ka mara 7 bée kònò :

- Kayi; Kulukòrò; Segu; Sikaso; Mòti; Tònbukutu; Gawo.

- Dugu hakè min ni kalansow dayèlèla o mara 7 kònò Jamakalan hukumu kònò o ye 130 ye

- Cè hakè min tògò sèbènna o ye 3373 ye

- Muso hakè min tògò sèbènna o ye 631 ye.

Nka o mògò sèbènnew bée ma to kalansow kònò, minnu tora olu filè nin ye :

- Cèw : 2145

- Musow : 445

Kalanden jolen minnu sòròla o kulu fila kònò o filè nin ye kiimèli bannen kò :

- Cèw : 514

- Musow : 23

SAN1987

Kiimèli y'a jira ko Mali kònò :


- dugu hakè minnu nin kalansow b'u kònò, olu ye 3271 ye.

- Kalansow hakè ye 3719 ye

- Balikukalan karamögòw (cèw ni musow) ye 7073 ye

- Kalandenw hakè ye : 75526 ye (musow ye 3525 y'o la).

Balikukalan yiriwara kosèbè san 1988 kònò; a kéra bée kunko ye : Cikèlaw, kalankèlaw Sòròdásiw, Zandaramaw, Polisiw...bée y'i seko ni dònko kë.



Ibrahima
Kante
Balikukalan
Baarada
Bamakò



Seko ni dònko kènè

KIBARU KANUBAGAW

Fòlò,
An tun ye baganw ye,
Bagan yèrémabilaw
Bagan kufétaalaw.
Bi,
Sé b'an ye ka kè bagan ye
Kulu kelen kònò
Kulu kelen na,
Kulu kelen fè...
An ka jè
An ka bèn
An ka sigi kènè kelen kan,
Ka kulu sigi sen kan,
Min bè mali kunnawolo waati
bèe !
Kibaru ye ji ye an bolo,
Min b'an dafa mugujalan bèe
nòoni.
An ka fara kufémögoya ma,
K'an ka seko ni dònko tòn sigi.
O tönsigiyòrò,
An bè nsiirinw da ka yèlè,
An bè poyiw kalan k'an taasi,
An bè kumabaw fò k'an yèrè
dòn !
Tòn de bè ko bèe barika;
Tòn de bè lawale yèrè sinsi;
Segu ma kè Segu ye tòn kò
Dinyè yèrè sigilen bè tòn de
kan.
Ne bè wele bila
An wolokanw sèbènbagaw bèe
ma,
An ka nyògòn sòrò kènè kelen
kan,
Ka kuma nyògòn ye,
Ka bèn kelen na,
Ka kòrò kura bange kibaru la.
Sèbènnikèla suguya bèe b'an
na;
Dönnikèla suguya bee b'an na;
Dalilu girin b'ap bolo
Min ye kibaru ye.
An ka jè, ka bèn,
N'o kèra an danbe bè sankòrò-
ta.
Nka, nyògònkbèn in dun
bèna kè,
Don jumèn sa ?

Tumani Yalamu Sidibe
Zafukuntigi
Kangaba

KONOGAN

Mun ye ne kònògan?
dinyèlatigèko
Mun ye ne kònògan?
sababunyumanko

Amadu GANYI Kante

DAKAN

Tile kònò,
Mun bè ye an fè,
An ka fagaba kònò
Siraba fèrèlenw jòjan fè,
Jalasunbaw kòrò,
Bolokòfèfènw !
Duguba nyamantonw !
Duguba nyigintòfènw !
Duguba farilakolonw !
An nyètana bilenw !
Nyè jugu bè jò u la,
Nyè nyuman bè jò u la,
U caman ka kèlèkèso,
Ye sarakadeli ye,
Sanni Dabæama ka wele cè.
U hinè minè !
Abada, o tè yèlèma don,
U ka dinyèlatigè la.
K'u naani,
K'u Ladon ni karama ye,
K'u minè i ko an dò,
Ka sarati bèe dafa u ye
U ka kisi b'o de la
Walasa u ka se k'u nyun,
U dakan na yewu !

Mòhamèdi Kònè
Lakòlikaramögò L.P.K.



AFIRIKI FARAJE SIYAWOLOMALAW

Nansara bòyòròjan !
Tubabu Fasontan !
Firinkan Duga !
Iye dòw fara ka bò u ba kò la
Iye dòw fara ka bò u ba sin na
Ka furucè fara ka bò furumuso la
Ka den fara ka bò fa la
K'u kè fasontan ye
K'u kè somògontan ye
Taasibali !
Malobali !
Kafiri !
Bilisi !
Iko, E ye tile ye.
Ko, ne ye su ye.
Kodònbalì !
Miiribali !

Tile gundo bè ban.
Su gundo tè ban.
Suman bè falen ne su kònò
Janfa bè dilan ne su kònò
Sunògò bè kè ne su kònò
Dunuya yèrè bè ban ne su kònò
Nansara bòyòròjan !
Nansara fasontan !
Ne su, fununfunun.
Ne su, gungrun !
Ne su, sama !
Ne su, wara !
Ne su, minnyanden !
Ne su, bunteniden !
N'bè taa fo kabanògò,
K'i firi, K'i pòtòpòtò.
Kodònbalì !
Miiribali !


Iye jònya duloki min coron ne kan na
Walahi ! N'b'a fara !
Iye jònya jòlòkò min siri ne sen na
Walahi ! N'b'a waraka
Iye nyègènè min kè ne kan,
Iye daji min tu he kan,
Tubabu
Bilakojugu !

Walahi N'bè u bèe seri i kan.
Ne su, N'bè san fin i ni kòròn cè.
Don ka jan, nk'a sebali tè.
Afiriki bè segin a danbe la.
Afiriki bè segin a denw ma.

Kumandan
Asimi Danbele
Mali sòròdasiya
ciyakèda la Bamakò.



1988 Biyenali 10nan



Afiriki jamana kuntigiw ka san 1988 kubèn senfè Adisabeba, olu bée bènn'a kan, k'u ka dannaya da Mali kelenyatòn, «UDPM» sekeretèri zenerali ni jamana fangaso kuntigi, zenerali Musa TARAWELE kan, k'o kè «OUA» peresidan ye, san 1988 kònò.

O dannaya ye Mali n'a wolodenw bée kunnawolokò ye, k'a masòrò, Peresidan Musa TARAWELE ka laadiriya dònna Mali kònò fòlò, ka sòrò, ka dinyè labò.

Wale kologirin fòlò: k'a ta san 1988 sètanburukalo tile 9 na, f'a tile 18 don, Mali jamana fan tan ni naani denmisènw ye nyògòn sòrò Bamakò, u ka BIYENALI 10nan gintanw na, n'o y'u ka san fila farikolo nyènajè n'u ka seko ni dònko jirali kènè ye.

Nyinan BIYENALI fana kèra kunkòròta wale ye, k'a d'a kan, a latèmèliko nyuman y'a jira jamana nyèmògòw ni jamana kònòmògòw tòw bée la, ko Mali denmisènw bénnen b'u ka jamakulutòn «UNJM» kònò.

Nyògòndan minnu kèra, a jirala k'olu bilala «badenya» de kadara kònò; k'u ma bila «fadanya» kadara kònò; ko minnu ye tògò duman sòrò nyògòndanw na, k'olu k'a dòn, ko tògò duman in ye Mali tògò duman de ye, k'a d'a kan, minnu ye nyèsòrò, i ko minnu kèra fòlòw ye farikolo nyènajè ani seko ni dònkok la, ani minnu ma nyèsòrò, olu bée lajèlen ye Mali denmisènw dòròn de ye, denmisèn yeleke wèrè tè minnu cèla, ka bò yòrò wèrè, Afiriki ani dinyè kònò.

Wale fèn o fèn kèra ani kuma fèn'o fèn fòra BIYENALI dayèlèdon n'a kuncèdon, Bamakò Disiriki nyèmògò, Yaya BAGA-

YOKO ani minisiri Bakari TARAWELE ni Peresidan Musa TARAWELE yèrè fè, olu bée nyèsinna «dusukurata» walew de ma, walasa hasidiya ka dabila; baara ka kè; gèlèya ni yèrèlabilà ka kèle, ka hèrè, lafiya ani sòrò karaba, kelenya kònò.

BIYENALI 10nan senfè, Mali denmisènw y'a jira, cogo bée la, k'u bée jamana ka nyètta nagasili n'a sumayali kunw dòn. O de kòsòn, u ka nyènajèw kònò, tinyèli walew jirala jama la, fo ka bée wasa.

O tèmènen kò, Mali denmisènw y'u ka cèsiri jira fasobaara la, cèsiri min bilala, cogo bée la, Pariti «UDPM» ni jamana fangaso haminankow minèn kònò.

Wale kologirin filanan: nyinan, Mali ka yèrèta sanyèlèma 28nan gintanw kadara bonyara kosèbè. O sababu bòrà Bamakò komini wòorò tòndenw ka labèn wale cènyiw la, ani jamakulutòn, «UNFM», «UNJM» ni «UNTM» ka cèsiri walew ani denmisènw ka cidenw, minnu bòrà maraw kònò, ka na BIYENALI gintan na, olu fana sendonniko nyuman defile la.

N'a bòrà Gawokaw la, minnu yamaruya-ra ka segin, yòrò janya kòsòn, denmisènw ka ciden minnu nana Biyenali la, olu bée tora Bamakò, walasa ka Mali ka yèrèta sanyèlèma 28nan in seli kè nkaniyajira ye, k'a nyèsin Peresidan Musa TARAWELE ma, a sugandili kadara kònò, k'a kè «OUA» peresidan ye.

Yèrèdònku min tun bée biyenalikèlaw da kònò o b'a jira ko: Peresidan Musa TARAWELE bée yòrò o yòrò, Mali denmisènw b'a kò, walasa ka faso baara, k'a jò, ka hèrè, lafiya ani sòrò sabati, bèn ni kelenya hukumu kònò.

kibaru kanubagaw

KA BO SENEGBALI

Né madi fofana de bë nin bataki ci aw ma, k'an ka nisòndiya jira balikukalan ni kibaruko kan. Sisan, n'sigilen bë Senegali jamana kònò, nka n'ma nyinè, wa n'tè se fana ka nyinè balikukalan n'a dafalan kibaru kò, bawo u ye ko caman nògòya ne bolo Senegali jamana kònò, yòrò min na Ala ni kalan in barika la ne bë se ka n'yérè nyénabò sira caman kan.

O la sa, n'b'a nyini n'ka dugumògòw fè, u k'u jija, bëe ka balikukalan matarafa; fèn don, a ye nafaba nyè ne ye. N'b'e n'karamògò Maki fali fo jijan, ka Amadu SANOGO fo Mali balikukalansoba la, n'o ye «DNFLA» ye. N'ka foli be «ODIPAC» balikukalan nyémògò Yaya JARA ye, ani Haruna TURE n'o ye «DNAFLA» arajo ciyakèda kuntigi ye. N'be jijan balikukalandenw bëe fo.

Ala ka balikukalan taa nyè, ka Kibaru sankòròta.

Madu FOFANA

KA BO MAKAN

Ne ye Mali kalanden ye Makan dugu kònò. Ne b'a fè ka bamanankan gafe dòw sòrò; n'aw bë se k'o sòrò cogo fò ne ye, o bë diya n'ye. Ne Yusufu kònè ka foli b'aw bëe ye faso kanw dondalali la.

Ala k'aw dèmè aw ka baara la, ka kun-kòròta di faso ma, ka sanjiko nògòya jamana kònò, ka sènèkèlaw wasa u ka cikè la.

Yusufu Kònè
ka bò Makan

Jaabi Min ye bamanankan gafew sòròli ye, an b'i ladònniya, an balimakè Yusufu Kònè, i bë se ka sèbèn ci Mali balikukalansoba ka adèrési la n'o ye «DNFLA» BP: 42 - Bamako (Mali). N'i b'a fè k'i kònòtaw jiidi kalansira suguya o. suguya la, i bë se k'o gafew sòrò balikukansoba la.

MASAKE NI BAMANANKE

Nia kéra masakè ni bamanankè dò ye:
So belebele tun bë masakè in fè. Ala y'a

kè so in nana sa. Masakè ka jònw taara sosu in fili bamanankè ka foro la.

Bamanankè wulila ka taa masakè ka so ka t'a fò a ye, k'a k'a ka sosu sama ka bò a ka foro kònò.

Masakè y'a jaabi ko : n'tè se ka bagansu in bò i ka foro kònò, n'i yèrè bë se, i bë t'a ta ka bò yen, k'a bila i nyènayòrò la.

Bamanankè seginna nka a ma maga sosu in na. A y'a to yen fò k'a toli k'a kasa bò.

Samiyè nana don, Ala y'a kè barasun kelen falenna sosu in nòna. Bamanankè ye barasun in kòròshiyèn fo bara in ye den kelen kè. Bamanankè ye bara tigè k'a b'a dayèlè k'a kè filen ye. A ye bara dayèlè yòrò min na, sodennin panna ka bò bara kònò; a bolila ka t'i jò masakè ka so siriyyòrò la.


Aw hakili la, soden in ye jòn ta ye, mögò fila ninnu na ?

Musa Male
Ka bò Pèkèna
«CARM» la

YELEMA DONNA MAKANTAA LA MALI KONO.

K'a sababu bò Mali silamèw ka kelenya ni nyètaa tònba (AMUPI) ka nyinini la, an ka jamana kònòròkow n'a marabolo mini-siri bë malì silamèw bëe ladònniya ko ni nyinan bòr'a la, fangaso sen tèna ye tugun hijitalaw ka kow nyènabòli la, i n'a fò a bë kè san tòw la cogo min na, k'u dèmè u ka hiji timèli konyuman na, kabini Mali la fo ka se hiji banni ma Mankari.

Mali silamèw ka kelenya ni nyètaa tòn «AMUPI» de yamaruyara a ka fangaso jòyòrò fa hijitalaw ka silamèya jiidili wale ninnu na Mali ni Makan jamana cè.



KUMA KOROMAW

«Fèn dò bë dinyè na, sen naani de b'a fè. N'a jòra a tè janya; nka n'a sigira a bë janya. A sigilen ka jan n'a jòlen ye. O ye fèn jumèn ye ?»

«Mògò saba jèra ka taa kungo kònò Minnògò y'u minè, nka u bëe y'a jira ko dònniya b'u kelen-kelen bëe bolo. U tora taama la kungo kònò, fòlò y'a bolonkòni turu duguma, kòlòn poyira o yòrò la. Filan ye kòlòn da jèngè k'i min. Sabanan ye kòlòn ta k'a dulon a kérè la.

Nin mögò saba bëe la, jòn ka dònniya ka bon?»

Daramani Dawu
Ka bò Zangunso «CARM» la

«Fèn kelen bë dinyè la, a bë dumuni min dun a ka so kònò, n'a y'o dun kènèma a kònòbara bë pérèn.

O ye Fèn jumèn ye ?»

«Fèn kelen bë dinyè na, terimaw, balimaw, sinjiw mana bèn, k'u diya cogo o cogo, don dò la, a b'u fara ka bò nyògòn na wajibiya la.

O ye Fèn jumèn ye ?»
N'ka foli bë ka taa arajo Mali baarakèlaw bëe ma, nka kérènkérènenya la, tanuni ni walenyumandòn bë ka taa Mamadu Nyama JARA ma, Kibaru jèmukan nafama lasebaga. N'b'e banbugu dugutigi fo, n'o ye daatin Male ye ani Mahamadu JAKITE ni Yakuba SIDIBE, n'o ye shèfudezèri ye ntosonin, npèsoba marà la.

Dirisa Male
Sòròdasi Pègèyina
«CARM» la

«Doni kelen bë yen, a ka girin, fò mögò bë nyini ka dësè a kòrò. Nka mögòsi t'a y'i kun wali i bolo fò n'i y'a bila duguma tuma min na.

O ye doni jumèn ye ?»

N'ka foli ni walenyumandòn bë ka taa arajoso baarakèlaw bëe ma, sanko kérènkérènenya la ka nyèsin Mamadu Nyama Jara ma.

Bakari Male
Sòròdasi Pègèyina
«CARM» la

kuma yòrò

KA BO KONGO

Nin ye foli ni barikada sèbèn ye min bòra Soriba Jakite fè ni balikukalanden tun don banankòrò, n'o bè jijan kubeda la, Kita mara la; nka an bè don min na, i ko bi, n'bè Puwènti Nuwari, Kongo jamana kònò.

Ne yèrè bolo kibaru kòrò de ye ko an k'an kibaruya di nyògòn ma, o de kòsòn ne bè yòrò o yòrò ne bè n'kibaruya lase kibaruso la, ka n'ka kanubaganciya jira faso kanw dondala n'u yiriwalikow kan.

O tuma, n'ka foli bè kibaru kanubagaw n'a lafasabagaw bée ye Mali kònò an'a kòkan. Nka, kérènkérènenya la, n'ka foli bè ka taa Maki Fali ma jijan ani Madi Fofana Suransan Tumuto ani Bahà Hayidara, n'o ye an ka animatèri ye Banankòrò.

O tuma na, ne bè n'ka sèbèn kuncè ni dakurunyè min ye, o ye de Ala ka kibaru sankòròta.

Soriba Jakite
Puwènti Nuwari
(Kongo)

KA BO LIBI

Nin ye nkaniyajira sèbèn ye, min kònò, ne Cémòkò Kulubali bè n'ka walenyumandòn lase Mali nyémògòw ni Balikukalanso ni kibaruso baarakèlaw bée ma, an ka jamana Maliba ka bònògòla sira teliman tèmèni na an bara kanw kalanni fè.

Ne ye maliden ye ka bò fukani-masugu, n'o bè fana mara la; nka an bè don min na i ko bi, n'sigilen bè sabaha, n'o ye Libi dugu dò ye.

Kibaru jèmukan tè tèmè ne kan. Sanga ni waati bée ne tulo nòròlen don arajo la, poyikanpoyi lamènni fè. O la sa, n'ka foli bè arajo Mali baarakèlaw bée ye; n'ka foli, tamuni ani walenyumandòn bè ka taa kibaru baarakèlaw bée ma. N'ma nyinè fukani balikukalan karamògò kò.

Cémòkò Kulubali
Sabaha
(Libi)

KA BO FABUGULA.

Ne karimu Tarawele ka bò fabugula, Kati mara la, n'bè nin lètèrè in sèbèn k'a ci kibaru ma, k'a baarakèlaw bée fo, k'u walenyumandòn.

Nka kuma kòròma dò fana bè n'bolo k'a da kibaru kanubagaw tulo kan: «Cè kelen bè dinyè kònò, cè in ka farin ka tèmè danfèn bée kan, a ka jan ka tèmè danfèn bée kan, a cè ka jugu ka tèmè danfèn bée kan, hali tasuma, a ka farin n'o ye.

Yali o ye mun ye?»

N'bè foli lase kibaru kalanbagaw bée ma, ka foli lase kérènkérènenya la Mamadu Nyama Tara ma, min b'an nimisi wasa juma o juma ni kibaru jèmukan nafama ye.

Karimu Tarawele
cikèla Fabugula
(Kati)

SIRAKOROLA KIIMELI JAABIW

Kalo o kalo kiimèli bè kè «RFA» jamana jèkawale ciyakèda dò balikukalansow kònò, n'o ye «G.T.Z» ye. A kun ye k'a dòn ni kalan bè kè konyuman, ni karamògòw ka kalan kècogo ka nyi walima n'a man nyi, ni kalandenw bè karamògò ka kalan faamuya.

Kiimèli bannen kò, an ye jòyòrò di kalanden mìogò tan ni fila (12) bée ma.

Yòyòrò	Tògò ni jamu	Sorolen
Fòlò	Adama Kulubali	44
Fòlò	Dòngose Kulubali	44
3nan	Adama Jara	43
3nan	Sungalo Kulubali	43
5nan	Soliba Kulubali	34
6nan	Musa Kulubali	33
7nan	Còri Fònba	27
8nan	Lasana Kulubali	22
9nan	Sinali Kulubali	17
10nan	Fuseni Kumare	14
11nan	Bufunè Jara	13
11nan	Fafere Tarawele	13

Musa Sidibe
«DNFAR»

BEE N1 MIIRINATA

* don o don bè sibontigi sòrò a diya la.

* Foyi man di siyòròntan ye fo sinyèna.

* Sugu ye bée jè ye; kungo ye cè ta ye nka siyòrò de ye hadamaden danbe ye.

* Cé dònyòrò y'a siyòrò ye.

* Ni jama y'i dòn i siyòrò, a b'ilakali fèerè dòn.

* Kò folonnin bée bée taa ba la, nka ba bée mògò de kun kan.

* Ji bée mògò jè, nka nfolo bée mògò saniya.

* don dò kòlònnin bée sen don dò minnògò nyè

* hadamaden taalan ye ji ye, nka a man kan ka da ji la.

* Kalan ni kodòn tè kelen ye.

* San kémè ye hakili kémè ye ni limaniya b'a sen kòrò.

* gèlèya bée n'a fura don, nka mògò hakilima de b'u bò nyògòn na.

* ko o ko mana kè ni hakili ye, o ko tè tinyè.

* i hakilijakabò sann'i k'i ka jò fili, o la i bée salen ta.

* hakili marayòrò ye sèbèn ye.

* Ni ye Ala de ta ye, nka bobaramugu fila ka taaka-segin ye suman nò ye.

* N'bèndiya tè dogo farikolo la.

* don kelen fa tè wulu kè doso ye.

* muso gadumandonga den tè bin.

* kònòbara tè kofèn ye, o de kòsòn fèn saniyalen de b'a lakana.

* n'i bolo banna bi, i ka sini sòròlen b'i nafa.

yèrèta defilekènè Bamakò

